


KORONTANA TAMINA TRANO FISOTROANA. MAHABO

Lehilahy mpanasaraka indray no maty nisy nidaroka



drisy fa namoy ny ainy, satria maro loatra ny ra very ary tena voa-mafy tokoa ratompokolahy . Nandray andraikitra avy hatrany ny polisim-pirenena ao Mahabo, ka nankatra fanadihadiana ary nampiantso ny tompon'ilay trano fisotroana, nandritra ny fanadihadiana ity tompon'ny trano fisotroana ity, no nahafantarana fa miisa 9 lahy ireo voarohirohy amin'ity raharaha ity, ka ny 3 no efa tratra raha mbola karohina kosa ny 6, hoy ny tompon'andraikitra avy eo amin'ny polosim-pirenena ao Mahabo Commissaire Hasindrainy Dauphin. Mitohy ny famotorana sy fikarohana hoy izy, fa ireo 3 lahy tratra kosa efa natolotra ny fampanoavana taorian'ny fanadihadiana

natao tamin'izy ireo, ka efa notanana am-ponja vonjimaika . Nosintonina kosa ny fahazoan-dalana hivarotra ho an'ilay trano fisotroana, ka nakatona ilay trano fisotroana io. Noraisina koa ny fepetra, fa tsy maintsy mihidy avokoa ny trano fisotroana rehetra ao amin'ny distrikan'i Mahabo manomboka amin'ny folo ora alina; izany no tapaka nandritra ny fivoriana izay niarahana tamin'ireo tompon'ny trano fisotroana ao Mahabo, notarihan'ny lebehin'ny Distrikan'i Mahabo ny alarobia lasa teo. Araky ny dinam-piarahamonina ao Mahabo dia izay mamono olona dia miantoka ny lany rehetra amin'ny fikarakarana ny razana sy ny fandevanana azy ; izany anefa tsy manakana ny mpitandro filaminana tsy hanao ny asany, ka eo indrindra no anaovan'ny fiara-hamonina sy ny fianakaviana antso avo amin'ny fitondrana foibe, ny mba hisamboarana sy hana-saziana izay rehetra nandray anjara tamin'ity vono olona, izay niniana natao

ity, na ireo nandray anjara nivantana na ankolana tamin'izao, satria dia misy ireo izay efa miezaka manao raharaham-pihavanana, ao koa ireo izay nitsoka ivelan'i Mahabo, ka manahy ireo mponina ny hahalasa izao vono olona izao, ho lasa fomba ratsy mahazatra toy ny fanapahan-doha sy halatra maso teo, satria ilay dinam-piarahamonina, tsy mbola tanterak'ireo voatonona amin'ity vono olona ity dia vao telo ihany no tratra. Itompokolahy dia isan'ny mpikambana sady mpitarika ny FIVE Menabe ao Mahabo, fikambanana ivondronan'ireo firaisamonim-pirenena ao Menabe, ka filoha mpitarika ny komity mpanaramaso izy. 52 taona izy izao maty izao ary namela mananontena iray sy kamboty 5 mianadahy. Nentina any an-tanindrazany any Ankazondrano ; kaominina Ambohimahazo ny alarobia 01 Martsa lasa teo ny razana ka nalevina ny alakamisy 02 Martsa ihany.

Fikambanana Soleil Marmailles Tokantrano 350 traboina any Mananjary notolorany fanampiana

Fianakaviana traboina miisa 350 no nahazo fanampiana avy amin'ny fikambanana Soleil Marmailles ny sabotsy teo, tany Mananjary faritra Vatovavy. Fianakaviana traboinan'ny rivodoza Freddy farany teo any Mananjary faritra Vatovavy, ireo nahazo fanampiana avy amin'ny fikambanana Soleil Marmailles ireo. Ity fikambanana ity dia tarihan'ny Dokotera Sylvie sy Tiana Razafintsalama, Malagasy monina sy miasa atsy amin'ny Nosy La Réunion. Fanampiana toy ny vary, labozia, briquet ary akanjo samihafa, no natolotra ny solontenan'izy ireo eto an-tanindrazana tamin'izany, izay nahitana an-dRamatoa isany Arphine Rahelisoa, sy Faniry Tsalonina ary Andriamatoa Harimanana Andriantantenaina. Ireo tokantrano traboina tena sahirana sy marefo avy amin'ny fokontany miisa 12 any Mananjary, no notolorana izao fanampiana izao. Efa fanaon'ity fikambanana ity ny fanaovana asa soa, asa sosialy toy izao eto an-tanindrazana, manampy koa izy amin'ny fanaovana foto-drafitrasa mahakasika ny lafiny sosialy. Tena sahirana ny ankamaroan'ny mponin'i Mananjary amin'izao fotoana, satria lasibatry ny rivodoza indroa miantona tato anatin'ny herintaona izao dia ny rivodoza Freddy farany teo, sy ny rivodoza Batsirai tamin'ny taon-dasa, ka izany no anisan'ny nitondrana izay voatsiramin'ny tanana ho azy ireo, hoy ny solontenan'ny Soleil Marmailles eto Madagasikara: Arphine Rahelisoa sy Harimanana Andriantantenaina. Nankasitraka izao fanampiana avy amin'ny fikambanana Soleil Marmailles izao, ireo nahazo izany tany Mananjary.

Tapany atsimon'i Menabe Mirongatra ny tsy fandriampahalemana sy ny valala

Very fanahy mbola velona ireo mponina ao amin'ny tapany atsimon'ny faritra Menabe, satria dia hatramin'ny faran'ny volana janoary teo dia mirongatra ny valala sy ny tsy fandriampahalemana. Raha ny ao amin'ny kaominina ambanivohitr'i Befasy ao amin'ny tapany atsimon'ny distrikan'i Morondava dia saika isan'andro dia ahenoa poa-basy hatrany ary efa misy mihintsy ny aina nafoy, satria tamin'ny alatsainy faha-20 febroary teo, vao tamin'ny valo ora alina dia raim-pianakaviana iray no notifirin'ny dahalo ary avy eo notapan'izy ireo ny lohany. Na dia miezaka mamaly aza ireo vahoaka dia tsy mahatohitra nefa na dia izany dia matetika mitondra tana-polo miverina ireo dahalo, ka izay no mahatonga azy ireo miverimberrina ary mitombo hatrany ny isany isaky ny miverina ary ta-

min'ity fiandohan'ity herinandro ity dia efa nandefa feo koa ireo dahalo, fa ho avy ka manao antso avo ireo mponina ny mba hijerena azy ireo, satria na dia misy mpitandro filaminana aza ao an-toerana dia sady vitsy no tsy ampy fitaovana ihany koa, ka sahirana rehefa misy hazo lava ; raha ny tapany atsimon'ny sy atsinanan'ny distrikan'i Mahabo indray dia rehefa tsy miady amin'ny dahalo dia miady amin'ny valala, satria dia mirongatra ny valala eo anelanelan'i Mahabo sy Mandabe iny ary efa manomboka manarona an'i Mandabe. Etsy ankilany, mbola ao Mandabe ihany dia ahiana ny hisian'ny ady antrano satria dia maro amin'ireo dahalo niova fo no miverina manao ny asa ratsy sy herisetra fanaony nohon'ny disadisa izay nitranga, noho ny nahafaty ny lebehin'ny kalaony iray dia lasa



Ilay raim-pianakaviana nisy nanapaka ny lohany.

mifanafika ireo fianakavian'ilay maty sy nitifitra. Ny mahagaga amin'ity raharaha ity, raha nantsoina tamin'ny finday ny CB dia nilaza fa milamina Mandabe tsy misy korontana izany nefa ny ben'ny Tanàna lefitra Andiamatoa Christian izay nilatsaka antsehatra nandamina ity raharaha ity, saika voakasi-tanana mihintsy ary nilaza ity ben'ny Tanàna lefitra ity, fa efa namonjy an'ny CB ihany izy

saingy tsy nisy vokany izany, koa miantso ny tompon'andraikitra ireo mponina mba hijerena akaiky azy ireo, fa mitebiteby izy ireo ary mitodika manokana amin'ny tompon'andraikitra eo anivon'ny zandary ihany koa, mba hanara-maso ny fomba fiasan'ireo tomponandraikitra any aminy, satria toa tsy hita soritra ny fisian'izy ireo any an-toerana. Etsy ankilany moa dia efa nandray andraikitra ny eo anivon'ny faritra ka miaramisalahy amin'ny komitin'ny fandriampahalemana, na ny comite de paix, ka ny avy eo amin'ny faritra no niantoka ny fandehan'ireto farany any Mandabe, araky ny fanazavan'ny governoran'ny faritra Menabe Serge Lucky, ka mahagaga ihany ny ilazan'ny CB fa tsy misy korontana ao Mandabe?

Rajepa



Ireo avy amin'ny fikambanana Soleil Marmailles, nanolotra fanampiana ho an'ireo traboinan'ny rivodoza tany Mananjary.

Iberanandrasana Johna Augustin « Tsy afa-misaraka ny fanabeazana sy ny Kolontsaina... »

Ny fanabeazana sy ny kolontsaina no antoky ny hisian'ny fampandrosoana, noho izy ireo fitaovana iray mahomby sy sahaza ny rehetra ahafahana mamolavola Olom-banona ara-tsaina, ara-batana ary ara-panahy, raha voafehy ny fampiasana azy, hoy i Iberanandrasana Johna Augustin, Olom-pirenena tsotra manaraka akaiky ny fivadihidihan'ny fiainan'ny firenena. Mila omena hasiny sy apetraka amin'ny toerana sahaza sy mendrika azy, araka izany, ny fanabeazana izay tsy tokony hisaraka amin'ny kolontsaina. Nomarihany fa raha tiana ny habita vokatry tsara ao anatin'ny sehanabeazana eto Madagasikara dia mila mifaka amin'ny kolontsaina, misy isam-paritra ny fandrafetana ny fandaharam-pianarana. Mila mamantatra ny niandohany: « Ioharano nipoirany », amin'ny alalan'ny fanabeazana omena azy ireo taranaka Malagasy, hoy hatrany Iberanandrasana Johna Augustin. Tsy ho afaka hitondra fampandrosoana sahaza ho an'ny tanindrazany tokoa mantsy ny taranaka tsy mahafantatra akory ny fiaviany. Hitarika hatrany amin'ny fahaverezan'ny hasin'ny tany izany ary ho tonga tsy hay tohaina sy hanao be fiavy toy ny misy ankehitriny Rafahantrana. Nanao antso avo ihany koa Iberanandrasana Johna Augustin, ho an'ireo rehetra misehatra amin'ny fanabeazana, mba samy handray andraikitra anatin'ny fahavononana omban'ny faharesen-dahatra an-tsitram-po, ho amin'ny famolavolana ireo taranaka handimby sy hitondra ny firenena rahatrizay. Tsy vitan'olon-drery na minisitery iray tokoa mantsy ny asa fanabeazana, fa mila ny fifanomezan-tanan'ny rehetra raha tiana ny hioty voka-tsoa. Takiana ny hisian'ny lalàna ahafahana miaro ireo mpisehatra amin'ny fanabeazana, mba tsy ho eo ambany vahohon'ireo mpanao politika hatrany ireo mpanabe sy mpampianatra isan'ambaratongany. Raha fiantinina, mila omena lanja manokana ny fanabeazana sy ny kolontsaina, raha tiana tokoa ny hisian'ny fampandrosoana sy ny fivaranana mankany amin'ny tsaratsara kokoa hatrany amin'ny fiainan'ny vahoaka Malagasy efa trotaka sy lanaky ny fahantrana lalina.



Lalaso Razafindrakoto

Rugby Championnat XXL Energy Top 20, 2023

Mbola miakatra kianja ny 3Fai Vakinankaratra

Na dia notandindomin'ny orana aza ny toe-trandro teto larivo dia tontosa soa aman-tsara ireo lalao rugby rehetra, voafaritry ny fandaharam-potoana ho tanterahina teny amin'ny kianja Makis Andohatapenka, tamin'ny alahady 05 martsa 2023 teo (tohin'ny andro voalohany). Niavaka tamin'izany ny mbola fiaka-

ran'ny ekipan'ny 3Fai Vakinankaratra an-kianja indray na dia eo aza ny olana mianjady amin'ny filohan'izy ireo, Mme Raisa, izay voatazona any am-ponja noho ny resaka nahavoasaringotra azy, nefa efa nanatsoahan'ireo mpitory ny fitoriana nape-trak'izy ireo taminy. Mbola mahatsiaro ho kamboty tanteraka anefa ity klio-

ban'ny 3Fai ity noho izany, ka misy fiantraikany eo amin'ny vokatry azon'izy ireo izany. Mangataka amin'ny tompon'andraikitra rehetra mahefa hatrany amin'ny filoham-pirenena, ireo mpilalao ao aminy mba hijerena akaiky ny mikasika an'ity filohan'izy ireo ity (famaohana ny didim-pitsara mitarazoka mikasika azy, sy

ny famelana ny zanany vao am-bolana vitsy hihaona aminy eny am-ponja). Ireo voka-dalao rehetra tamin'io andro voalohany dingana faharoa io : Uskar (31)-(19)3FAI, STM (13)-(10) XV Avenir, Mang'art (40)-(39)UASC, TFMA(19)-(14)TFA.

Rainilita